

金光明經玄義

隋天台智者大師
門人灌頂說
錄



清刻龍藏佛說法變相圖

金光明經玄義卷上

碑六

隋天台智者大師說

門人灌頂錄

此金光明甚深無量太虛空界尚不喻其高
廣況山斤海滴寧得盡其邊崖日輪赫奕非
嬰兒之所瞻仰大舶樓櫓豈新產者之所執
持諸佛行處過諸菩薩所行清淨況二乘心
口安可思說凡夫徒欲言之言則傷其實徒
欲不言默則致其失二俱不可欲以言之言
亦不可欲以默之默亦不可故大品中梵志
云非內觀故得是菩提非外觀故得是菩提
非亦內亦外觀故得是菩提經言皆不可思
說又生生不可說生不生不可說不生不生
可說不生不生不可說有因緣故亦可得說
者以金為名名蓋眾寶之上以法性為體義

則如來所游莊嚴菩薩深妙功德以爲宗照
曜諸天心生歡喜以爲用故文號經王教攝
衆典故唯貴爲名唯極爲體唯深爲宗唯大
爲用唯王爲教所以不二之體常爲四佛世
尊之所護持三世十方亦復如是一切菩薩
徧他方以遙禮樹神善女親雨淚以稱揚諸
天覆之以天威地祇潤之以地肥大辯加之
以辯道功德益之以財寶諸有悉乾枯三塗
除熱惱舉要言之一切世間未曾有事悉皆
出現是以金龍尊王三世讚歎地神發願以
護說者上聖既爾豈況人乎敢託斯義輒欲
興言冀消露入海禽鳥向山實藉片緣同均
鹹色將釋此經大分爲二初釋題二釋文釋
題爲五一釋名二辨體三明宗四論用五教
相就此五章大分爲二初總釋二別釋總釋

又二初生起二簡別生起者此娑婆國土音
聲爲佛事或初從善知識所聞名或從經卷
中聞名故名在初以聞名故次識法體體顯
次行行即是宗宗成則有力力即是用用能
益物益物故教他聞名是自行之始施教是
化他之初有始有終其唯聖人乎五章生起
次第如此簡別者簡是料簡也問若略則唯
一若廣則無量今此五章進不是廣退不成
略何故五耶答非略非廣非略故不一非廣
故不多廣則令智退略則義不周我今處中
說令義易明了五章中當其義如此別者分
別也前一章總三字共爲名次三章派三字
以爲別後一章兼於總別而明教相也又顯
體一章明理餘四章明事又前三章是因後
二章是果又前四章是行後一章是教又前

四章是自利行後一章是利他行又前四章是聖默然後一章是聖說法如此等種種分別料簡今顯譬中當分明包富如囊中有寶不探示人人無知者此皆爲分別中作譬也囊中有寶爲總三字作譬探以示人爲別三字作譬囊中有寶爲理一章作譬探以示人爲明事章作譬其餘例皆可知也二別釋者別釋五章也今先解釋名章若依四卷題但作三字無帝王兩字若依經文有經王之義若說若不說俱亦無妨今釋名爲五一通別

二翻譯三譬喻四附文釋五當體釋言通別者夫教有通別依教明行行有通別從行顯理理有通別且置行理但明教通別者夫理無名字名字名理如虛空無丈尺丈尺約虛空天王般若云總持無文字文字顯總持若

從能顯之文字是名則通若從能顯之所以此名則別云何爲通如聖所說一經一時一處一部一偈一句一言皆是文字從此文字通稱爲經云何爲別別則有四一令世諦不亂歡心悅耳二逗化所宜開發宿善三對其業障令惡滅罪除四點示道理霍然妙悟悅宜對悟各各所以其致不同稱之爲別譬如鹽梅相和成種種滋味組織交橫成種種文繡從別所以故有金光明三字標今教異於諸教從通文言故有經之一字衆經通稱也今經通別合標故言金光明經二翻譯者真諦三藏云具存外國音應言修跋拏婆頗婆鬱多摩因陀羅遮閱那修多羅修跋拏此言金婆頗婆此言光鬱多摩此言明因陀羅此言帝遮閱那此言王修多羅此言經外國又

稱佛陀羅此間所無又略帝王兩字但存三字者漢人好略譯者省之但翻爲金光明經也餘師翻不及此委悉也三譬喻者舊經師以三字譬三德金譬法身光譬般若明譬解脫若大師云數論但明真應二身若以二釋三於論不便若取經文經文無一處明三德若別作義解何義不通而獨譬三德既違已論又不會經非今所用地人云金質之上自有光明之能譬於法性從體起用自有般若解脫之力但作體用二義不須分光明異也

碑六

若大師云地論幸明三佛三佛釋題於義自便而棄三身從體用者則非論意若取經文新舊兩本並說三身不道體用亦違已論復不會經進退何之今所不用真諦三藏云三字譬三種三法一譬三身二譬三德三譬三

位譬三身者金體真實以譬法身光用能照以譬應身明能徧益以譬化身次譬三德者金有四義一色無變二體無染三轉作無礙四令人富金以譬法身常淨我樂四德光有二義一能照了二能除闇以譬般若照境除惑明有二義一無闇二廣遠以譬解脫衆累永盡溥益有緣次三位者金性先有知道前正因位光融體顯知道中了因位明無瑕垢知道後緣因位彼家料簡云法身是實二身不實法身具四德般若解脫各具二德正因是本有了因是現有緣因是當有大師謂三三之釋三義不了一因果不通二乖圓別三不稱法性云何因果不通夫三身三德本是果上圓滿之名而今分置三德殘缺不足何者若法身是道前爲是果上之法身爲是性

碑六

五

德之法身若是果上之法身不應在道前若是性德之法身性德何獨有法身亦應有性德之般若性德之解脫云云若言般若是道中爲是何等之般若若是果上之般若不應在道中若是分得之般若何意無分得之法身解脫云云若解脫在道後道後衆善溥會何獨有解脫以是觀之因果不通乖圓別者若作圓說法身常樂我淨此自可知云云般若與法身相真法身既具四德般若寧無四德耶解脫脫果縛故樂脫因縛故淨無因果縛故我非因非果故常圓說圓滿無有缺減真諦若作別說應依此經經云法身是常是實實即我德也應身智慧清淨即淨德也化身三昧清淨即樂德也三藏說法身獨具四德二身各具二德故皆乖圓別也不稱法性者且引

一經如淨名云衆生如彌勒如一如無二如此性德法身也一切衆生即菩提相不可復得此性德般若也一切衆生即涅槃相不可復滅此性德解脫也如此三義豈非本有道前之位豈獨有金而無光明耶又華嚴云初發心時便成正覺所有慧身不由他悟清淨妙法身湛然應一切妙法身是法身德慧身是般若德應一切即應身是解脫德此之三身地地轉增如月漸滿豈非道始因中之位那得因中祇有般若耶道後具三德如上說六此事可知當知道前圓性德道中圓分德道後圓究竟德那忽分割一處唯一耶豈非靈鳳於鳴巢迴神龍於兔窟辱鱗羽之壯勢非法性之圓談天台師尋其經意義則不然何者經言法性無量甚深理無不統文稱經

王何所不攝豈止於三三九法耶當知三字
徧譬一切橫法門乃稱法性無量之說徧譬
一切豎法門乃稱法性甚深之旨方合經王
一切徧收若長若廣教無不統此義淵博不
可以言想且寄十種三法以爲初門復爲三
意一標十數二釋十相三簡十法言標十數
者謂三德三寶三涅槃三身三大乘三菩提
三般若三佛性三識三道也諸三法無量止
取此十法其意云何此之十法該括始終今
作逆順兩番生起初從無住本立一切法夫
三德者名祕密藏祕密藏顯由於三寶三寶
由三涅槃三涅槃由三身三身由三大乘三
大乘由三菩提三菩提由三般若三般若由
三佛性三佛性由三識三識由三道此從法
性立一切法也若從無明爲本立一切法者

一切衆生無不具於十二因緣三道迷惑翻
惑生解即成三識從識立因即成三佛性從
因起智即成三般若從智起行即成三菩提
從行進趣即成三大乘乘辦智德即成三身
身辦斷德即成三涅槃涅槃辦恩德利物即
成三寶究竟寂滅入於三德即成祕密藏也
是爲逆順次第甚深無量義復云何無量義
者是一法門具九法門三德尊重即是三寶
三德不生不滅即是三涅槃三德具足諸法
聚集名爲三身運載荷負即是三大乘不可
異趣名三菩提覺了清淨名三般若若是如來
種名三佛性分別不謬是名三識即事通理
故名三道是爲一三法門具九三法門亦具
一切三法門悉例可知又皆具一切一法門
一切二法門一切三法門四法門五法門六

法門七法門八法門九法門十法門百法門
千法門萬法門億法門一恒沙二恒沙百千
萬億恒沙法門亦應可知經云一法門無量
法門以爲眷屬一中解無量是爲法性橫廣
無量之義也甚深義者寄三位顯之如十法
門共論者三道三識是本有位三德三寶是
當有位其餘是現有位是名法性甚深豎高
之義亦成又一法門具九法門取其三道三
識是本有位取三德三寶是當有位取其餘
者爲現有位甚深義亦成又一一法門具六
即位理即是本有位究竟即是當有位其餘
即是現有位甚深義亦成是爲法性豎高甚
深之義也當知金光明三字徧譬一切橫法
門故言無量徧譬一切豎法門故言甚深乃
稱法性之文方合經王之旨次釋十種三法

碑六

相者十名如前已列十相今當分別若分別
色相青黃同異者應用肉眼若分別法相深
淺同異者應用智眼今時行者既無智眼應
用信解分別同異之相初明三德相者云何
三云何德法身般若解脫是爲三常樂我淨
是爲德法者法名可軌諸佛軌之而得成佛
故經言諸佛所師所謂法也身者聚也一法
具一切法無有缺減故名爲身經言我身即
是一切衆生真善知識當知身者聚也般若
者覺了諸法集散非集非散即是覺了三諦
之法解脫者於諸法無染無住名爲解脫是
名爲三云何爲德一一法皆具常樂我淨名
之爲德法身無二死爲常不受二邊爲樂具
八自在爲我身業淨口業淨意業淨爲淨無
以爲類疆寄世金以譬之世金不變不染轉

變富貴譬法身四德也般若任運具四德如智真如境故大品云色淨故般若淨例此即得色常色樂色我諸義皆成又云色大故般若大色無邊故般若無邊此是法性廣大般若亦廣大例此應云色深奧故般若亦深奧此是法性豎高般若亦豎高當知般若亦具四德明矣解脫亦具四德夫解脫者諸惡永盡即無常無樂無我無淨皆已盡也亦是衆善溥會即常樂我淨溥會也大經云真解脫者即是如來如來即是法身當知解脫同如來常樂我淨也又大經云三點具足名大涅槃點是文字當知法身般若解脫皆文字也故知三點悉備四德故言具足三因即是三智三智各具四德三德具足名祕藏藏具足之文必具四德也當知四德具足即是其相

釋六

九

若得此一章意餘九可解不能默已更復略言云何三云何寶佛法僧是爲三可尊可重名爲寶至理可尊名爲法寶覺理之智可尊名佛寶毗盧遮那徧一切處即事而理此和可尊名僧寶此之三寶皆常樂我淨常樂我淨故乃可尊可重當知三德與三寶無二無別既以金光明喻三德還以金光明譬三寶也云何三云何涅槃性淨圓淨方便淨是爲三不生不滅名涅槃諸法實相不可染不可淨不染即不生不淨即不滅不生不滅名性淨涅槃修因契理惑畢竟不生智畢竟不滅不生不滅名圓淨涅槃寂而常照機感即生此生非生緣謝即滅此滅非滅不生不滅名方便淨涅槃當知此三涅槃不生不滅即是常常故名樂樂故名我我故名淨涅槃既即

常樂我淨即是三德可尊可重故即是三寶
無二無別既以金光明喻三德三寶還以金
光明喻三涅槃也云何三云何身法報應是
爲三三種法聚故名身所謂理法聚名法身
智法聚名報身功德法聚名應身然理無聚
散義言聚散始從初心顯出正理乃至究竟
理聚方圓始從初心終至究竟顯理之智智
聚方圓始從初心終至究竟功德之聚方圓
故以三法聚爲三身當知三身皆常樂我淨
即是三德可尊可重即是三寶不生不滅即
是涅槃無二無別既以金光明譬三德等還
以金光明譬三身也云何三大乘運荷名乘
理性虛通任運荷諸法故名理乘隨乘者智
隨於境如蓋隨函故名隨乘得乘者得果得
機得果故自解脫得機故令他解脫故名得

乘當知三乘皆常樂我淨即與三德無二無
別既以金光明譬三德還以金光明譬三大
乘也云何三菩提一真性菩提亦名無上菩
提此菩提以理爲道二實智菩提亦名清淨
菩提此菩提以智慧爲道三方便菩提亦名
究竟菩提此菩提以善巧逗會爲道當知三
菩提皆常樂我淨與三德無二無別既以金
光明譬三德還以金光明譬三菩提也云何
三般若般若名智慧實相般若非寂非照即
一切種智觀照般若非照而照即一切照方
便般若非寂而寂即道種智當知三般若皆
常樂我淨與三德無二無別既以金光明譬
三德還以金光明譬三般若也云何三佛性
佛名爲覺性名不改不改即是非常非無常
如土內金藏天魔外道所不能壞名正因佛

性了因佛性者覺智非常非無常智與理相應如人善知金藏此智不可破壞名了因佛性緣因佛性者一切非常非無常功德善根資助覺智開顯正性如耘除草穢掘出金藏名緣因佛性當知三佛性一一皆常樂我淨與三德無二無別既以金光明譬三德還以金光明三字譬三佛性也云何三識識名爲覺了是智慧之異名爾菴摩羅識是第九不動識若分別之即是佛識阿黎耶識即是第八無沒識猶有隨眠煩惱與無明合別而分之是菩薩識大論云在菩薩心名爲般若即其義也阿陀那識是第七分別識訶惡生死欣羨涅槃別而分之是二乘識於佛即是方便智波浪是凡夫第六識無俟復言當知三識一一皆常樂我淨與三德無二無別既以

三德譬金光明還以金光明譬三識也云何三道過去無明現在愛取三支是煩惱道過去行現在有二支是業道現在識名色六入觸受未來生老死七支是苦道道名能通此三更互相通從煩惱通業從業通苦從苦復通煩惱故名三道苦道者謂識名色六入觸受大經云無明與愛是二中間名爲佛性中間即是苦道名爲佛性者名生死身爲法身如指冰爲水爾煩惱道者謂無明愛取名此爲般若者如指薪爲火爾業道者謂行有乃至五無間皆解脫相者如指縛爲脫爾當知三道體之即真常樂我淨與三德無二無別既以金光明譬三德還以金光明譬三道也若見此十法門若同若異亦是一法門作一切法門相若同若異相相明了即百法千法

碑六

十二

萬法恒沙塵數亦如是華嚴云一法門無量法門而爲眷屬首楞嚴和香丸大品裹珠法華一地所生涅槃大海水浴皆是其義問若一法即是諸法者唯說一法何用餘法耶答佛爲悅一切人宜一切人對一切人悟一切人若徧說之多有利益一說尚令生種種解徧讀諸異論即知智者意故種種說令得一切解麤言及要語皆歸第一義皆是示人無違諍法即此義也三料簡者初料簡三德若指太子相好體爲法身法身在前樹王下時明無漏慧三十四心爲般若般若在中八十滅度燒身不受後身爲解脫解脫在後異而且縱法身時無般若般若時無解脫解脫時無般若法身此即三法各異斯乃阿含三藏數家所用此之三意恐不得稱常樂我淨也

若指空境爲法身法身是本有照真之慧爲般若般若是今有子果兩縛盡爲解脫解脫是當有異而且縱斯乃三乘通教中所說前代探明大乘人所用亦不得稱常樂我淨若如真諦師明法身具四德般若解脫各二此乃橫而且異乃別教一途所明而真諦師徧用當知法身可稱爲德般若解脫無德可稱不會無量甚深之高廣亦不得稱爲經王今所明三德如上說一一皆具常樂我淨論廣則無量論高則甚深若諸學人聞諸經之王四佛所護不解此意如牛羊心眼不足論道也料簡三寶者若指樹王得道爲佛寶轉生滅四諦法輪爲法寶度陳如等五人先得眼智明覺者爲僧寶由是三寶故到于今即有相從三寶者此乃阿含中所明階梯三寶亦

是數論宗用也。若指樹王得道爲佛寶所說，無生四諦爲法寶，二乘菩薩修真無漏斷結，成聖理和爲僧寶者，此亦三乘通教中所說。探明大乘人所用此兩種三寶，並無常樂我淨。若指華王世界坐蓮華臺成道爲佛寶，所說恒沙佛法無量四諦爲法寶，四十一賢聖爲僧寶，此則異前。雖非階梯，未是同體。亦非金光明所譬三寶也。料簡三涅槃者，若饑得食，病得差，獄得出，獼猴得酒，旃遮婆羅門飽食，指腹皆是。世人暢情爲涅槃，爾若計非想定，無想天爲涅槃者，此是邪見妄謂爲涅槃。爾若多貪欲人，得不淨觀爲涅槃者，斯乃四善根方便行人涅槃也。若三界煩惱盡證有餘涅槃，焚身灰智入無餘涅槃，菩薩未得此涅槃，此即阿含中析法二乘之涅槃。若三乘

人同盡子果兩縛，即是通教中共涅槃。若指中道如理爲性淨涅槃，中道智爲圓淨涅槃，同緣出世薪盡火滅爲方便淨涅槃，三種各別互不相關，是爲別教涅槃。若言但有性淨方便淨兩涅槃，不明緣因涅槃，各別不融者，

碑六

十四

還是別教。非今經所譬涅槃也。料簡三身者，若取樹王下佛爲真身，神通變化猿猴鹿馬爲應身，不明三身者，此小乘析法意。爾若取即事而真爲真身，化用爲應身，不明三身者，此體法中意。爾問若爾樹王下文六既非佛，復非鹿馬，爲是何身？答：一往應同人像，此屬應身。又一解，例如大乘心中智合中理爲法身，今亦如是。體是人像，即是真空，此屬真身。若依真諦師云：法身真實二身不真實，此則三身體相各異，乃是別教中一途，非今所用。

若言三身皆真實至理是法身契理之智是報身起用是應身應身是實佛所化皆實不虛大經云不淨觀亦實亦虛非實不淨作不淨想是為虛能破貪心是為實應身例爾非本體故為虛能利益故為實今取實邊不取虛邊故言三身皆實是今所用若復圓論三身皆實皆虛皆亦實亦虛皆非實非虛當約三身並作四句如別記云問三字譬三身亦得譬一身二身四身無身不答佛赴緣以三字名經義家作三身解釋若得意者作四三
十六
二一無義亦復何答下經中悉有其文若作四身者新本云釋迦牟尼能種種示現此則開出應化是為四身若作三身者即有三身分別品專論其義若作二身者佛真法身猶若虛空應物現形如水中月若作一身者新

本云一切諸佛以真法為身若作無身者如來行處淨若虛空而復游入善寂大城虛空中則無一二之數此是無身之文問若爾云何以金光明譬四身二身一身無身耶答若以義名譬盈縮由義爾若譬四身者取光明之上有煜爚之燄文云金光晃曜此是譬四身之文若譬三身如即所用若譬二身金是正體光明只是功能以此為譬若譬一身但舉於金以為正譬光明既是枝末非正所論若譬無身者至寶以無貪為金揚震四知亦以無貪為金今以世之至寶譬出世之至理彌會文義也料簡三大乘者若約因緣六度大乘者此還是三人名別義同也若約三人同用無生斷煩惱三人同乘一乘此則通教中乘也若理隨得三乘體相別異不同者此

則別教中乘也三種並為得乘方便所攝也
正法華中明象乘足三為四羊鹿牛乘為得
乘所攝象乘即是理乘如今之所明三乘也
華嚴中明四乘三乘亦為得乘所攝佛乘正
是今之三乘義也料簡三菩提者如請觀音

云修三種清淨三菩提心此即緣三乘人心
而修心也乃是方便菩提所攝若緣真如實
理發菩提心者或緣如來智慧說法發菩提
心者或緣如來神通變化發菩提心者亦非
今所用文殊問般若云無發是發菩提心又

十六

十六

若一發一切發是發菩提心又若非一非一
切而一而一切是發菩提心如此菩提心即
一而三並今所用於一而論三於三而論一
爾云料簡三般若者問般若至忘至寂云何
分別諸法耶答一切智觀慧眼見見法皆非

法道種智觀法眼見見非法皆是法一切種
智觀佛眼見見法非法非非法雙照法非法
若三智三眼一時圓觀一切法寂滅相種種
行類相貌皆知五眼具足成菩提汝所問者
乃是眇眼所見偏觀所觀與則是曲見奪則
墮尼捷也料簡三佛性者真諦師云正性在
道前了性在道中緣性在道後此一往別說
推理不然華嚴云一中具無量大品云一心
具萬行淨名云舉足下足具於佛法矣法華
云一切智願猶在不失涅槃云金剛寶藏具
足無缺但有深淺明昧之殊爾料簡三識若
分別說者則屬三人此乃別教意非今所用
若依攝論如土染金之文即是圓意土即阿
陀那染即阿黎耶金即菴摩羅此即圓說也
問如經云依智不依識既云三識此那可依

十七

十七

答經言不依識者是生死識今則不爾今言
依識者是智之異名名清淨識又道前通名
爲識道後轉依即是智慧未詳料簡三道者
問界內可有十二輪轉三道迷惑界外復云
何答寶性論云生界外有四種障謂緣相生
壞緣即無明爲行作緣即煩惱道也相即結
業即業道也生即名色等是苦之初壞即老
死是苦之終即苦道也有此四障障於四德
緣障淨相障我生障樂壞障常四障破四德
顯也第四依經文立名者上來舉譬多是義
推依文立名顯然可解何者義推踈遠依文
親近以已情推度是故言踈彼義例此是故
言遠用佛口說是故言親即此經文是故言
近豈可棄親近而從踈遠耶始從序品終乎
讚佛品品之中若不說金光明名即說金光

明事或一品說名不說事或一品說事不說
名或一品名事兼明或一品名事獨說或一
品重說名重說事故知品品不空篇篇悉有
爲此義故依文立名也序品云是金光明諸
經之王創首標名彌爲可用次壽量品四佛
俱集王舍城放大光明照王舍城及此三千
大千世界發起其事懺悔品信相夢見金鼓
其狀殊大其明溥照過夜至旦向佛說之讚
歎品金龍尊王奉貢金鼓發大誓願願我當
來夜則夢見晝如實說空品云故此尊經略
而說之尊經即金光明也四王品六番問答
問問之中重說其名答答之內重明其事又
以手擎香鑪時香煙變爲香蓋金光不但徧
此大千亦徧十方佛土云云大辯功德已下標
名舉事其例甚多若信相所夢是現在金光

明之事龍尊發願是過去金光明之事香蓋徧滿是未來金光明之事一部名事徧十八品一處起煙十方光蓋非但現在亘通三世若名若事縱橫高廣無量甚深爲若此也而不用此標名義推譬喻無有一文無而疆用有而不遵明識者審之無俟多云又諸經例多如稻稈芥柯象步城經等說其事指所說事仍即爲名又如說稻稈事芥柯事象步事等即名爲稻稈芥柯象步經事也第五當體得名者有師云真諦無名世諦有名寄名名於無名假俗而談真爾成論云無名相中假名相說今反此義俗本無名隨真立名何者如劫初廓然萬物無字聖人仰則真法俯立俗號如理能通依真以名道如理尊貴依真以名寶如理能該羅依真以名網如理能起

應依真以名響華嚴中云耕田轉耒衣裳作井皆聖人所爲大經云世諦但有名無實義第一義諦有名有實義以此而推真諦有名更何所惑龍樹四依菩薩隨義理爲立名字義即第一義理即如理也淨名云從無住本

釋六

十九

立一切法經論咸然豈可不信今言法性之法可尊可貴名法性爲金此法性寂而常照名爲光此法性大悲能多利益名爲明即是金光明之法門也菩薩入此法門從法爲名即是金光明菩薩佛究竟此法門即有金燄光明如來金百光明照藏如來等若爾何故名釋迦釋迦此有通別名從通即名金光明允同諸佛從別即受釋迦之稱爾故讚佛品云如來之身金色微妙其明照曜曜即是光此是讚佛法體非讚世金也當佛法性爲金

非借世金也三身品云與諸佛同體與諸佛
同意與諸佛同事同體者是同法性金也同
意者同法性光也同事者同法性明也故華
嚴云一切諸如來同共一法身一身一智慧
力無畏亦然一身即是同金智慧即是同光
力無畏即是同明於一法體三義具足非假
世金寄況佛法故樹神云無量大悲宣說如
是妙寶經典當體並是妙寶此寶具足光明
非借世金以譬法也
金光明經玄義卷上

音釋

舶薄陌切海中大船也櫓音魯船具煜音藥余六切煖音煖余六切
燿光捷切明也捷巨言稗音古旱切禾莖也

金光明經玄義卷下

碑七

隋天台智者大師說

門人灌頂錄

問舊云此經從譬得名云何矯異而依文耶
答非今就文而害於譬若苟執譬復害於文

碑七

義有二途應須兩存故前云義推踈遠依文
親近若鈍根人以譬擬法若利根人即法作
譬下文云如深法性安住其中即於是典金
光明中而得見我釋迦牟尼又空品云為鈍
根故起大悲心鈍人守指守株寧知兔月利
人懸解不須株指云次觀心釋名者何故須
是上來所說專是聖人聖寶非已智分如鸚
鵡學語似客作數錢不能開發自身寶藏今
欲論道前凡夫地之珍寶即聞而修故明觀
心釋也淨名曰諸佛解脫當於衆生心行中

求釋論云有聞有智慧是所說應受即此意
也問心有四陰何以棄三觀一答夫天下萬
物唯人為貴七尺形骸唯頭為貴頭有七孔
目為貴目雖貴不如靈智為貴當知四陰心
為貴貴故所以觀之心貴故心即是金夫螢
火自照燈燭珠火雖復照他光不及遠星月
之光與暗共住日光能照天下不能照理心
智之光能發智照理故心是光若心癡暗體
則憔悴心有智光膚色充澤故大品云般若
大故色大般若淨故色淨亦能充益受想行
等心即明也又知心無心名為光知想無想
知行無行名為明又知四陰非四陰名為光
知色陰非色陰名為明又知五陰非五陰名
為光知假人非假人名為明又知正報非正
報名為光知依報非依報名為明又知依正

碑七

二

非依正名爲光知一切法無一切法名爲明
得此意者即觀心金光明也上約十種三法
論金光明今觀心王即觀苦道觀慧數即煩
惱道觀諸數是業道心王是金慧數是光餘
數是明如淨名曰觀身實相觀佛亦然者若
頭等六分各各是身此即多身若別有一身
則無是處各各非身合時亦無若頭等六分
求身叵得現在不住故不可得過去因滅亦
不可得未來未至亦不可得如是橫豎求身
畢竟不可得即是無此無亦不可得亦有亦
無亦不可得非有非無亦不可得但有名字
名之爲身如是名字不在內非四陰中故不
在外非色陰中故不在中間非色心合故亦
不常自有非離色心故當知名無召物之功
物無應名之實假實既空名物安在如此觀

身是觀實相實相即是金實相觀智即是光
緣身諸心心數寂不行者即是明也觀身是
假名假名既如此觀色受想行識亦如是即
爲苦道觀也次觀煩惱道者煩惱與業皆是
身因今且取煩惱爲身因而起觀也淨名云
不壞身因而隨一相者應作四句分別誰身
因果俱壞誰身因果俱不壞誰壞果不壞因
誰壞因不壞果云何是身果父母所生頭等
六分是也云何身是因貪恚癡身口意業等
是也今且置三業觀貪恚癡等四果以無常
苦空觀智破貪恚癡子縛斷名壞身因不受
後有名壞身果凡俗之流名衣好食長養五
陰縱心適性放逸貪恚癡自惱惱他一身死
壞復受一身因果相續無有邊際是名因果
俱不壞如犯王憲付旃陀羅如怨對者自害

其體身既爛壞四陰亦盡是為壞果貪恚癡身因轉更熾盛彌綸生死無得脫期是為第三句也餘三果亦以無常觀智斷五下分因縛五下分果身猶未盡是名壞身因不壞身果如此四句存壞不同皆不隨一相隨一相者所謂修大乘觀觀一念貪恚癡心心為自起為對塵起為根塵共起為離根塵起皆無此義非自非他非共非無因亦非前念滅故起非生非非生非滅非非滅如是橫豎求心叵得心尚本無何所論壞是名不壞身因而隨一相隨一相者即是隨金隨相智即是隨光諸數寂滅即是隨明既得不壞一句而隨一相了壞身因亦隨一相壞身果不壞身果亦隨一相皆亦如是云云次觀業道者如淨名云舉足下足無非道場具足一切佛法矣觀

舉足時為是業舉為是業者舉為業業者共舉為離業業者舉若業舉不關業者業者舉不關於業各既無舉合亦無舉合既無舉離那得舉舉足既無下足亦無觀行既然住坐卧言語執作亦復如是是為觀業實相名為金此觀智名為光諸威儀中心數悉寂名為明是為三道辯金光明夫有心者即具法界法性金光明能如此解了但是名字金光明常依此觀念念不休心心相續即是觀行金光明若蒙籠如羅穀中視未得分明閉目則見開眼則失此是相似金光明若了了分明閉目開目俱見者是分證金光明若妙覺果圓究竟明了名究竟金光明也次觀心明三識論金光明者諦觀一念心即空即假即中即是觀心識於三識何者意識託緣發意本

無識緣何所發又緣中爲有識爲無識若有識緣即是識何謂爲緣若無識那能發識若意緣合發二俱無故合不能發離最不可當知此識不在一處從衆緣生從緣生法我說即是空於此空中假作分別是惡識是善識是非惡非善識種種推畫強謂是非識若定空不可作假識若定假不可作空當知空非空假非假非空非假雙亡二邊正顯中道一念識中三觀具足識於三識亦不得三識觀故淨名云不觀色不觀色如不觀色性乃至不觀識不觀識如不觀識性雖不得識不得識如不得識性雙照識識如識性宛然無濫以照識性故是菴摩羅識照識如故是阿梨耶識亦照亦滅故是阿陀那識是名觀心中三識金光明六即位如上說次觀心明三佛

釋七

五

性金光明者觀一念心起即空即假即中是見三佛性何者心從緣起是故即空強謂有心是故即假不出法性是故即中此釋已顯更引經證之淨名云何謂病本所謂攀緣何謂攀緣謂緣三界證其假也何謂息攀緣謂心無所得此證即空我及衆生病皆非真非有此證即中華嚴云心佛及衆生是三無差別此證觀心即三佛性也又般舟三昧經云我心如佛心如佛心如我心如不見我心爲佛心不見佛心爲我心而見阿彌陀佛如瑠璃中見像如饑夢食如夢姪從事如觀骨光等喻皆是證即空即假即中之文讀此經文宜須細意若併作如讀是即空也示如許多心紛紜是即假也見阿彌陀是即中也又我心如佛心如者以有我佛如等分別之異所

以是即假從不見我心爲佛心去是即空也而見阿彌陀是即中也又以夢食喻之夢食不飽譬即空夢食百味譬即假皆不出法性譬即中餘譬類如此又釋云我心佛心者是假名假名分別我佛之異也我心如佛心如凡聖俱空不得我心不得佛心豈有我心作佛心佛心作我心亡假也不得我心如不得佛心如豈有我心如作佛心如亡空也是爲雙亡空假正顯中道而見阿彌陀者雙照二諦也常見佛餘者安不見耶此又是證觀心即空即假即中之文觀心即中是正因佛性即空是了因佛性即假是緣因佛性是爲觀心三佛性是金光明六即位如前說復次佛者覺智也性者理極也能以覺智照其理極境智相稱合而言之名爲佛性今觀五陰稱

碑七

六

五陰實相名正因佛性觀假名稱假名實相名了因佛性觀諸心數稱心數實相名緣因佛性故經云佛性者不即六法不離六法此之謂也觀五陰實相故名金觀假名實相故名光觀心數實相故名明六即位如前思得此大好故附此後也次觀心三般若金光明者諦觀一念之心即空即假即中即是三般若何者一念心一切心一切心一心非一非一切一念心一切心者從心生心雜雜沓沓長風駛流不得爲喻日夜常生無量百千萬億衆生六道輪迴十二鈎鎖從閤入閤閤無邊際皆心之過也故言一念心一切心是則凡夫所迷沒處一切心一心者若能知過生厭皆自持出如小火燒大積薪置一小珠澄清巨海能觀心空從心所生一切諸心無不

即空故言一切心一心如此一心乃是二乘所迷沒處非究竟道雙亡二邊故煩惱非一非一切大經言依智不依識識但求樂凡夫識妄求樂二乘識求涅槃樂是故雙亡不可依止智則求理如是觀者即是一心三智即

釋七

七

空是觀照般若一切智即假是方便般若道種智即中是實相般若一切種智是三智一心中得即空即假即中無前無後並不別甚深微妙最可依止是爲觀心三般若金光明六即如前次觀心三菩提金光明者諦觀一念之心即空即假即中即是三菩提心何者一心一切心交橫繚亂如絲如沙如蠶如蛾爲苦爲惱若知即空真諦菩提心度妄亂心數之衆生通四住之壅是爲即空發菩提心即假發菩提心者空雖免妄亂經云空亂

意衆生而智亂甚盲闇復是三無爲坑是大乘冤鳥未具佛法不應滅受而取證也若真即假俗諦菩提心度沈空心數之衆生通塵沙之壅分別可不分別時宜分別藥病分別逗會不住無爲故言即假發菩提心空是浮心對治假是沈心對治由病故有藥藥存復成病病去藥止宜應兩捨非空非假雙亡二邊即發中道第一義諦菩提心度二邊心數之衆生通無明之壅以不住法住於中道故言即中發菩提心說時如三次第觀即不然一心中三菩提心若觀即中是緣金發無上菩提心若觀即空是緣光發清淨菩提心若觀即假是緣明發究竟菩提心是爲觀心三菩提金光明六即如前次觀心三大乘金光明者諦觀一念之心即空即假即中是三大

乘何者雖觀一念心而實有四運此心迴轉不已所謂未念欲念念已從未念運至欲念從欲念運至念從念運至念已復更起運運運無窮不知休息如閉目在舟不覺其疾觀一運心即空即假即中一一運心亦復如

碑七

是從心至心無不即空即假即中是則從三諦運至三諦無不三諦時是名以運運運若隨四運運入生死若隨三運運入涅槃即空之觀乘於隨乘運到真諦即假之觀乘於得乘運到俗諦即中之觀乘於理乘運到中諦三乘即一乘是乘微妙清淨第一觀音普賢大人所乘故故名大乘是為觀心三大乘金光明六即如前次觀心三身金光明者諦觀一念心即空即假即中即是三身何者華嚴云心如工畫師造種種五陰若心緣破戒事

即地獄身緣無慙愧憍慢恚怒等即畜生身緣諂曲名聞即餓鬼身緣疾妬諍競即修羅身緣五戒防五惡即人身緣十善防十惡緣禪定防散亂即天身緣無常苦空空無相願即二乘身緣慈悲六度即菩薩身緣真如實相即佛身登難墜易多緣諸惡身故故知諸身皆由心造譬如大地一能生種種芽若觀五受陰洞達空無所有從心所生一切諸身皆空無所有如翻大地草木傾盡故言即空若即空者永沈灰寂尚不能於一空心能起

碑七

九

一身云何能得遊戲五道以現其身不得應以佛身得度者為現佛身應以三乘四眾天龍八部種種身得度者皆悉示現同其事業為此失故故言即假同六道身如此觀身墜在二邊非善觀身善觀身者大經云不得身

八尺之形也不得身相五胞形也不得身因
飲食將養也不得身果酬五戒也不得身聚
陰入界也不得身一假實成身不得身二四
大成身也不得身此已一身也不得身彼彼
遺體也不得身識念念無常也不得身等身
中空也六道皆等有身也不得身修依身能
修法也不得修者即行人也亦不得身如身
相如乃至身修如修者如亦不得身性身相
性乃至身修性修者性畢竟清淨爲此義故
故言即中言即中者即是法身即空者即是
報身即假者即是應身是名觀心三身金光
明六即如前次觀心三涅槃金光明者諦觀
心性本來寂滅不染不淨染故名生淨故名
滅生滅不能毀故常不能染故淨不能礙故
我不能受故樂是爲性淨涅槃若妄念心起

悉以正觀觀之今此正觀與法性相應妄念
不能染不能毀不能礙不能受常樂我淨者
即是圓淨涅槃又以正觀觀諸心數法
不行心數法不能毀不能染不能礙不能受
者名方便淨涅槃是名觀心三涅槃金光明
六即如前次觀心三寶金光明者諦觀一念
之心即空即假即中即是三寶何者不覺名
法寶覺名佛寶和名僧寶三諦之理不覺故
是法寶三諦之智能覺故是佛寶三諦三智
相應和故是僧寶無諦智不發無智諦不顯
諦智不和不能大用利益衆生三種皆可尊
可重是故俱稱爲寶六即如前復次中諦不
覺名法寶真諦不覺名佛寶俗諦不覺名僧
寶知即中離二邊名法寶知即空名佛寶知
即假名僧寶即中事理和名法寶即空事理

和名佛寶即假事理和名僧寶即中名為金
即空名為光即假名為明是為觀心三寶金
光明六即如前次觀心三德金光明者諦觀
一念之心即空即假即中即空故一空一切
空無假無中而不空空無積聚而名為藏藏
具足故名之為德即假故一假一切假無空
無中而不假假攝諸法亦名為藏藏具足故
名之為德即中故一中一切中無空無假而
不中中攝一切法亦名為藏藏具足故稱之
為德雖言一中有無量無量中有一了彼互
生起展轉生非實智者無所畏當知一不為
少眾不為多非一非多不失一多不可思議
不縱不橫不並不別諸佛以即中為體故名
法身以即空為命故名般若以即假為力故
名解脫一一皆常樂我淨無有缺減故稱三

碑七

十一

德一一皆是法界多所含藏故稱祕密藏故
淨名云諸佛解脫當於一切眾生心行中求
當知我心亦然眾生亦然彼我既然諸佛亦
然心佛及眾生是三無差別得此意者即中
是金即空是光即假是明此為觀心三德金
光明六即如前世間有行空人執其癡空不
與佛修多羅合聞此觀心而作難言若觀心
是法身應觸處平等何故於經像生敬紙木
生慢敬慢既異則非平等非平等故法身義
不成既無平等平等智不成則無報身不能
將此化他應身義不成不如我於經像紙木
平等平等皆如如名法身有此平等智是報
身將此智化他是應身我三身義皆成用汝
觀心何為若逢此難者當以三事反難答之
一者汝謂於紙木經像平等為如者何意於

七廟敬木像天子符勅而生畏敬於佛經像而生輕慢畏慢既起諸使沸亂何處有平等法身義耶二者汝於同師同學生愛生護於異師異學生慢生悲愛慢從癡生三毒熾然諸惡更甚寧復有智慧報身耶三者汝耽癡空無慧方便尚不悅人情況會至理矜高自著是增上慢人汝師所墮汝亦隨墮毒氣深入若爲將此邪氣化他和光應身復在何處我以凡夫位中觀如實相爾爲欲開顯此實相恭敬經像令慧不縛使無量人崇善去惡令方便不縛豈與汝同耶今更釋帝王者真諦三藏云法身攝華嚴華嚴以法身爲體故報身攝般若般若明智慧故應身攝涅槃涅槃明百句解脫四德等故此是彼師明帝王統攝之義今明帝王應具三義謂帝慧王也

碑七

十二

帝則貴極至尊至重慧則神謀聖策王則萬國朝會備此三義稱帝慧王此經亦爾如來游於無量甚深法性過諸菩薩所行清淨即是至尊極貴義若有聞者則能思惟無上甚深微妙之義開甘露門入甘露城處甘露室令諸衆生食甘露味以智慧刀裂煩惱網即是聖智雄略義諸佛護持莊嚴菩薩諸天恭敬護世讚歎能令地獄諸河焦乾乃至一切世間未曾有事悉具出現即是萬國朝會多致利益義將此三義歷十種三法門苦道即法身是貴義煩惱即般若若慧義業即解脫是朝會義乃至法身德即貴義般若德即慧義解脫德即朝會義一一法門悉備三義一一法門皆是經王也既得此意即論攝法攝法有三先攝法門次攝經教三攝六即位初

攝法門者三道攝一切惑三識攝一切解三佛性攝一切因三般若攝一切智三菩提攝一切發心之行三大乘攝一切發趣之位三身攝一切佛果智德三涅槃攝一切佛果斷德三寶攝一切佛恩德三德攝一切理是爲十三橫攝法門第二攝教者三道是三障即三障是三解脫攝不思議解脫淨名教三識攝楞伽地持攝論等三佛性攝涅槃三般若攝大品等五時教三菩提攝諸方等經三大乘攝法華三身攝華嚴三涅槃三寶三德等皆攝涅槃此舉當道諸經結是八萬法藏皆應攝爾云第三攝位者苦道有一切五陰煩惱道有五住惑業道有一切業乃至云三道是三障障覆六位若即三種之非道通達三種之佛道者六位所顯則攝諸位也乃至三德亦

有六位三德既備攝六位寧不備收耶其間則例自可知云所以作三番攝者合帝慧王三義攝法門合貴義攝教合慧義攝位合王義又攝法門是橫攝攝位是豎攝攝教是橫豎雙攝統攝之義既明經王之義顯矣次觀心明經王者觀心即中是貴義觀心即空是慧義觀心即假是朝會義是爲觀心中經王也觀心論位者衆生本有理性金光明心但有名即名字金光明念念修觀即觀行金光明觀心淳厚即相似金光明會入法流即分證金光明盡邊到底即是究竟金光明若不修觀徒聞何益如遥羨寶山足不涉路安可得乎爲此義故須觀心一番令聞慧具足也次釋通名者如法華玄義中說云第二辨體爲三一釋名二引證三料簡釋名者體是質

質是主質何爲主質之體法身法性是經體
質若依義者法身爲體質若依文者法性爲
體質法身法性只是異名更非兩體欲令易
解是故雙題爾法性語通今以佛所游入法
性爲體質也云文是時如來游於無量甚深法

碑七

十四

性過諸菩薩所行清淨故知此體不與下地
菩薩及二乘等共非通法性也但是佛所游
入一切種智以此爲根本無量功德共莊嚴
之種種衆行而歸趣之言說問答共詮辨之
類衆星之環北辰如萬流之宗東海故以法
身法性爲此經正體之主質也故書家解體
者體也體有尊卑長幼君父之體尊臣子之
體賤當知體禮之釋與經法性意同如來所
游佛所護持故知此體是貴極之法也復次
體是底義窮源極底理盡淵府光揚實際乃

名爲底釋論云智度大海唯佛窮底此與今
經法性甚深意同當知法性高深豎窮佛海
故以底義釋體也復次體是達義得此體意
通達無壅如風行空中自在無障礙一切異
名別說皆與法性不相違背釋論云般若

一法佛說種種名隨諸衆生類爲之立異字
又云若如法觀佛般若與涅槃是三則一相
其實無有異此與今經法性無量意同當知
法性廣大無涯橫收法界徧無所隔故以達
義釋體也二引證者序品云如來遊於無量

碑七

十五

甚深法性鬼神品云若入是經即入法性如
深法性二文旣云深法性即知簡異二乘菩
薩所得法性也空品云故此尊經略而說之
說於空即如也讚佛品云知有非有本性空
寂當達此等皆體之異名悉會入法性法是

軌則性是不變不變故常一此常一法性諸佛軌則故云法性爲此經體也三料簡者問法性定是空爲非是空答法性過諸菩薩所行清淨淨於四句不應以空有求之雖非四句或時赴緣作四句說之文云兩足世尊行處亦空新本云是第三身是真實有又云前二種身是假名有又云非有非無此有四句四門意也門乃有四悟理非數佛示人無諍法不應執此相競舊本明空新本明有以體達義釋之二文不乖即此意也第三明宗者宗謂宗要也說者或以果爲宗或以因爲宗或雙用因果爲宗今尋壽量品雖明施食不殺之因乃將因擬果果是正意三身分別品雖復問因佛答三身還是果爲正意今此意但用佛果爲宗何者法性常體甚深微妙若

欲顯之非果不克當知果是顯體之樞要如提綱目整則以果爲宗意在此也更附經重顯此義文云釋迦如來所得壽命釋迦是果人壽量是果法果人克果法冥乎法性法性既非有非無非常非無常果人果法亦非常非無常法性既能常能無常果人果法亦能常能無常四佛釋疑舉山斤海滴地塵空界無能算計知其數量明其能常八十滅度是能無常此見八十滅度之無常不能計校其常尚不能知其常焉能知其非常非無常若不約果此義難明既舉果冥理顯體義彰以果爲宗其義如是又說果義不同或約無上菩提智德明果或約大般涅槃斷德明果若舉智德衆善溥會任運知有斷德若舉斷德諸惡永盡任運知有智德互舉一邊不可偏

執也今經舉壽量明果壽量是果報果報語
總總於智斷智斷亦總果上三身果上三身
既與法性真法性非常非無常三身亦非常
非無常法性既能常能無常三身亦能常能
無常若能無常即化身壽命也對無常而論
常能常即報身壽命也報化與法性真法性
既非常非無常不可算數報化亦非常非無
常不可算數云何見迹短而言佛壽定短此
不識果能顯體之意又如佛非鹿馬能現鹿
馬鹿馬定是佛耶鹿馬是佛化所爲非佛身
也法性能長短長短非法性也若見此意果
能顯體常義亦成非常非無常義亦成無常
義亦成果爲宗要義亦成若不爾者諸義皆
不成舊用山斤海滴之文是無常謂虛空分
界是虛空無爲復引捨身品中求常樂住處

釋七

十七

者是三無爲爲常無生死故爲樂也皆以小
意曲解大乘如此解者一切皆不成非宗要
也第四明用用謂力用也滅惡生善爲經力
用滅惡故言力生善故言用滅惡故言功生
善故言德此皆偏舉具論畢備也夫一切種
智是果上之德果智由於無量功德之所莊
嚴滅除諸苦與無量樂苦是惡業果貪恚癡
是惡因惡因不除果不得謝聖人意先令滅
惡因故懺悔品居先樂是善果懺讚是因懺
罪讚聖惡滅善生故讚歎品居後亦是互舉
爾將此勝用莊嚴果智智備體顯體顯名金
果備名光力成名明益他曰教也但懺品滅
惡非不生善讚品生善非不滅惡互說一邊
爾空品雙導懺不得空惡不除滅讚不得空
善不清淨文云一切種智而爲根本即其義

也四王品已下護經使宣通還是生善攘災
令去還是滅惡攝此諸文故言以滅惡生善
爲用也第五判教相者舊明此經非會三非
褒貶非無相不列同聞衆不在五時次第而
明常住者是偏方不定教是義不然若不列
同聞非次第者列同聞衆應是次第爲攝摩
羅列同聞與衆經不異論褒貶與維摩意同
論家何故不預次第若列衆不列衆皆非次
第者亦應列衆不列衆俱是次第云若言未
應明常而明常是偏方不定者陀羅尼云王
舍城波羅柰祇陀林三處與聲聞記此亦是
未應會三而會三得爲次第未應明常而明
常何故不定耶又法華般若淨名方等咸論
常住得是次第此經明常獨居不定何耶又
一師言此經與法華同是第四時山斤海滴

碑七

十八

與塵沙義齊故是義不然新本云舍利繫縛
色如來常住身無有舍利事何得山海而翳
金光塵沙而蔽寶所真諦三藏云此經是法
華之後涅槃之前九十日說引涅槃云佛告
波旬却後三月吾當涅槃信相聞斯故知八
十應滅是義亦不然唱滅之旨非獨告魔定
在三月法華云如來不久當般涅槃普賢觀
亦云當般涅槃諸經唱滅非但一文何必九
十日耶縱令三月爲屬第四時爲屬第五時
若屬第四時法華已捨方便此中何得更許
三乘同懺若屬第五時何得復言在前三月
進退無據兩楹不攝云云今既不同舊若爲判
教若安無相而時異若入會三而未別案下
文云曾聞過去空閑之處有一比丘讀誦如
是方等大乘既言方等豈非文耶方等之教

通於三乘新本云欲生人天欲得四果支佛
欲得佛皆應懺悔滅除業障安處方等其義
無疑而難者言新本云法界無異乘此害於
通義然方等滿字通別通圓此旨非妨難者
以不列同聞爲疑胡本尚多何必止四卷七
軸或其文未度爾如此斟酌五味明義則第
三生酥攝若四藏明義則雜藏攝四教明義
則通教攝通教之中即得論帶別明圓也

金光明經玄義卷下

音釋

沓徒合切 重沓也 駛疎士切 疾也 壅於用切 塞也 褒貶褒博切 毛切
揚美也 斂切 抑損也